



Universitätsbibliothek Paderborn

**Poemata Ferdinandi Episcopi Monasteriensis Et
Paderbornensis, S. R. I. Principis, Comitis Pyrmontani,
Liberi Baronis De Furstenberg**

Ferdinand <Paderborn, Bischof, II.>

Parisiis, 1684

Daphnis sive Fridericus Furstenbergius Parens, ...

urn:nbn:de:hbz:466:1-7748



Bale del.

Suaviter et Fortiter

Edelinck sculp. c.p.r. 1683.

DAPHNIS SIVE FRIDERICUS FURSTENBERGIUS PARENS,

BILSTENII ET WALDENBURGI DYNASTA;
Advocatus hereditarius in Graffschafft; Schnellenberge, Watter-
lappie, Furstenbergæ, & Herdringe Dominus; Satrapa Fredebur-
gensis; Westphalia & Angaria Archisatrapa; & Serenissimo Fer-
dinando Electori Coloniensi ab intimis Consiliis, anno M. D C. XLVI.
V. Idus Augusti Bonne defunctus.



MISII virides umbrat qua plu-
rima ripas
Fonde salix glauca, Lycidas hinc,
Tityrus illinc,
Alter oves, alter pascebatur forte
capellas.
Tityrus, ut semper, pellebat tædia cantu.

A

2 FERDINANDI EPISCOPI MONASTER.
Carmina dum Veledæ memorat, dum prælia Vari:
Varus ut his olim nomen memorabile terris
Fecerit, ut sparsi legionum sanguine campi.
Aurem illi vellit Lycidas: Neque talia tempus
Carmina poscit, ait: Daphnis tibi, Tityre, Daphnis
Lugendus: Daphnini, si nescis, fata tulere.
Tityrus ingemuit casu percussus acerbo:
Fistula lapsa manu est: fugit sensusque colorque.
Ut mens, ut rediit puero vox: Occidis, inquit,
Carum, Daphni, caput; spes, Daphni, decusque
tuorum!
Ab dulci patria procul, amplexuque tuorum
Occidis! hoc fuerat, quod summæ culmine villæ
Tristia signa daret ferali carmine bubo;
Flebilibus quod sponte modis mea nuper arundo
(Hanc mihi tu, dederat Corydon tibi, Daphni,)
sonaret.
Nunc sileat, ramoque infelix pendeat illo.
Vos etiam sine me (quamvis mihi vos quoque
Daphnis
Tradidit, atque abiens, Has, inquit, Tityre, pasce)
Ite tamen sine me, quoquo lubet, ite capellæ.
Amnis, & umbrosæ salices, & rura valete.
Usque ego per silvas errans desertaque solus
Triste querar. Gemit erepta sibi matre juvencus:
Nec minus amisso mater dolet orba juvenco:
Mella queruntur apes cellis subducta, peremtos
Feta canis catulos; demtos avis arbore pullos:

ET PADERBORNENSIS POEMATA. 3

Daphnin ego, tristi sublatum funere Daphnin.
Supremas saltem voces morientis ab ore
Excipere, affari extremum, & spectare jacentem,
Atque oculos nostra licuisset condere dextra !
Vulneribus nonnulla meis solatia saltem
Hæc ferret pietas. solus de Daphnide luctus
Nunc supereft. Pecudes illo quis pascat ademto ,
Avertatque luem, curamque impendat & artem ?
Daphnide non melior quisquam depellere venis
Implicitam pestem, & membris agere atra venena.
Daphnis & insidias stabulis prædasque cavebat.
Ah gelidas quoties hiemes perpessus & imbræ,
Pervigil exegit brumali sidere noctem ,
Incustoditum fera ne vastaret ovile ;
Ne lac subtraherent pecori , ne vellera fures !
Ah quoties humeris per devia sustulit ipse ,
Rupe parens nuda quos nixa reliquerat , hœdos !
Angarides Nymphæ testes, quas sæpe laborum
Miratas dixisse ferunt : Mortalia non sunt ,
Quæ tolerat : saxo certe riget ille vel ære ,
Quem neque ventorum rabies, pluviaæque, nivesque ,
Non cœlum inclemens , non ulla injuria frangit.
Nymphæ, non saxo Daphnis neque constitit ære.
Occidit heu ! & nos pariter , terrasque reliquit.
Nequidquam roseum spargis jubar , auree Titan:
Gratius extinctum nobis in Daphnide lumen.
Daphnidis adventu tellus ridebat & æther ,
Frondebant silvæ , spirabant floribus arva ,

A ij

4 FERDINANDI EPISCOPI MONASTER.

Ipsi lætitia montes plausuque fremebant.
Daphnidis interitu tellus lugebit & æther,
Squalebunt silvæ, stabunt sine floribus arva,
Intonsi montes gemitus ad sidera tollent.
Ergo nil proavum series, regnataque late
Rura juvant, centumque greges, armentaque centum,
Nil labor, & studium pulchræ virtutis, & artes?
Ergo cinis, formaque carens & triste cadaver
Nunc jacet ille omnes nuper pulcherrimus inter
Pastores! nec siderea fulgentia luce
Lumina, nec vultum, quem fixerat ipsa venustas,
Cernere erit posthac? At non quæ sustulit illum
Mors, etiam famam tollet. Sint tempora Musis
Non inimica meis, volitabis Daphni per ora.
Ipse ego virtutesque tuas, tuaque inclyta facta,
Invictamque fidem, & sanctæ pietatis amorem
Ferre Syracosio tentabo ad sidera versu.
In partem veniet Phœbo dilectus Amyntas,
Et mecum teneris passim tua nomina fagis
Inscribet: crescent illæ, tua nomina crescent.
Quin etiam niveo tumulum de marmore Damon
Exstruet, & tali signabit carmine marmor:
HIC SITUS EST DAPHNIS. QUOD ERAT MOR-
TALE SEPULCHRO
INTULIT ATRA DIES: VIVET PER SECULA
NOMEN.
Ad tumulum venient, instaurabuntque quotannis
Pastores tibi cum donis funebria justa.